

Cama Tsətsəfə Nə Bulusu Anə Njir Galatiya

Usa Dzau

¹ Cama tsətsəfau sara ara Bulusu, cama səsə nə Yesu. A'yi nji ənga alaga ndə ngə sə də mai. Ama Yesu Kərsiti ənga Hyal Tada ngə sə də, ndəra hya'ana nyi sara vir tau.

² Na'ya ənga patəkura wazha ama kəra ənga yau, nga vər sə cama kau, anə patəkura njir nu, njira wu Galatiya.

³ Mayiwakur ənga hudə pərtəu sara ara Dərmən Hyal ənga Yesu Kərsiti nda nggya ənga hyi.

⁴ Yesu Kərsiti lər kərnyi arya bikər mən, aga ja mbədana mən sara ara nggyabiya dəmwa'yi kau, ənggəra Hyalər mən wu yiwu.

⁵ Bəgə kadakadarkur a nggya nə nyi ba'anuwa. Amina.

Vanyi Ndəshigu Paməu A'yi Mai

⁶ Səra hya vər məl kau a dərī sər hivər gagađau anə də. Wu pəci kushu ənggər kau, kəja hya piyar nu ndəra nggar hyi lagu mayiwakur Kərsiti, ka təkəri hyi nu vanyi ndəshigu mafəliyangəu.

⁷ Ya, vanyi ndəshigu pamə a'yi mai. Yi nar hyi abangau, ara alenyi nju hya hangəkala hyi, ndu nərdzə aga nda bəlana jirkur nə ndəshigu nə Kərsiti.

⁸ Ama yu na anə hyi, ma vanyi ndə a'yi wu pama 'ya kəra wu shili ənga vanyi ndəshigu pamə a mwara kəra 'yi nə hyi kau, alaga waladi kəra sara dəməlmə ngau, bəgə nda nyi a də ndə shishi'wau!

⁹ Ənggər kəra 'yi nar hyi tsu kadəu, yu bəra nar hyi abangə tsu, abər kalar ndəra bəra nar hyi vanyi ndəshigu pamə a mwara kəra hyi dləwuri kau, bəgə ja də ndə shishi'wau!

¹⁰ Hyu nggani yu gal dləwu dzau ara nji əndəga ara Hyal ya? Əndəga yu gal aga nja fal də ya? Awau! Maja huda nji nga yu yiwu ya pina, nayi də ndər məl thlər Kərsiti mai.

Ənggəra Bulusu Da Cama Səsau

¹¹ Wazha ama, yu yiwu hya səni abər ndəshigu kəra yi tətəlna anə hyi kau, a'yi sara ara ndə nga nyi mai.

¹² Nayi dləwuri sara ara ndə mai. Ənga ətsu a'yi ndə ngə highiḃə anə də mai. Yesu Kərsiti ənga kərnyı ngə cabiya də.

¹³ A nggari hyi culi nggyabiya də kəra dədəməu, wu sər nu nə njir Yahudiya, ənggəra yi nə nyi ḃwaḃwatə gagadə anə njir nu Hyal ənga jirkur. Kəra təkəri yu yiwu aga ya tətəlna kəra njir nuwur nda.

¹⁴ Nahyi tsu, a sənər hyi ənggəra yi nu səra njir Yahudiya wu nu. Yu ndiya badəgala njir Yahudiya njira 'yi hə wu nu sər ciji ənga nda ənga dəfu hamu.

¹⁵ Ama Hyal wu mayiwakur nyi, ji cadəbiya də kadivira nji ya də. Ənga ətsu ji ngga də, ba ji

¹⁶ pahəna liya yau aga ya lari Zər nyi. Ənga aga ya tətəlna ndəshigu məsahəu anə njira a'yi njir Yahudiya mai. Ar pəci ta, nayi gal səmana ara ndə mai,

¹⁷ ənga tsu nayi ma'yi a vu Urshalima a vu gya njira də cama səsə a mwara yi mai. Ənggərna ba yi

ma'yi a ndar 'yi'yir njir Arabiya, ənggau ba yi sha shili wu məlmə Damasəkasu.

¹⁸ Kəl ayukudə fa makəru, ba yi ma'yi a vu Urshalima aga ya vuwa lari Kefasu, naja ngə Simanu Biturusu. Ətsu kə yi məliya pida kumou apə təfu nga ja.

¹⁹ Ar pəci ta, nayi lari alaga ndə zəmə wu pama cama səsə mai, kəl Yakubu zamiya Thlagəu.

²⁰ Ənga jiri yu nar hyi wu mwar Hyal, sərə ya vər tsəfau anə hyi kau, a'yi fati mai.

²¹ Ayukudə tsu, kə yi ma'yi a ndar 'yi'yir Səriya, ənga 'yi'yir Silisiya.

²² Ama ar pəci ta, njir nu Kərsiti kəra a'yi wu 'yi'yir Yahudi, nandə wu sən də bama ənga bama kwatahə mai.

²³ Nanda tsu a nggar nda, nji na, “Ndəra dədəmə jilər ɔwaɔwatə anə 'ya, kabangəkau, kəja ju na ndər mbərsa ar kəra ndər kəra dədəmə ju dza!”

²⁴ Kə ndə fal Hyal arya sərə ji məl lagu də.

2

Alenyi Cama Səsau Hənggəri Ənga Bulusu

¹ Ayukudə fa kumou apə fədəu, yi bəra sha a vu Urshalima. Wu pəci kau, nayi ənga Barnabasu ngə ma'yi, ba tsu 'yi həri Tayitusu.

² Yi ma'yi a ndara nda ara Hyal ngə cabiya də wu mətakər aga ya ma'yi. Ta yi nda, ba yi nda bə əkkə'yi alenyi njir tədəməwə nə njir nu Yesu, ba yi cabiya nda zhizhir nda ar kəra ndəshigu kəra yi tətəlna anə njira a'yi njir Yahudiya mai. Yi cabiya nda najaka sau, aga ya sənbiya abər nayi ənga nda a hənggər 'ya ar kəra thlər kau, ənga a sara nərdzə

ða wu thlær kæra ya vør mæl ænga kæra yi mælna a ða sæ kurthlæu.

³ Alaga bazhi bə ða Tayitusu kæra ndær Gærikə ngau, nji a'yi ciwa nyi aga nja thlana nyi pælzha mai.

⁴ Ndær ar kæra thla pælzha kə hya'ari sara ara njir nu nə fafati kæra shili dædæwa. Ndə shili wu pama 'ya aga nda sa tsambiya nggyabiyar 'ya wu Kærsiti Yesu, aga nda bəra shabiya 'ya aga mafa.

⁵ Ama alaga kushu na'yi hæggæri ænga nda mai, arya 'yu yiwu 'ya tsærpær hyi jirkura ndæshigu kau.

⁶ Ama alaga njir tædæmwar nda, nandə cakəri sə ar kæra særa yi highi bə kə mai, (wu dænga ða alaga wa nga nda, patə lagu zəmə nga nda anə ða, arya Hyal wu ca pampamækur mai).

⁷ Nanda ænga kærnda tsu a lar nda ænggæra Hyal hæggæri ji nə ða thlær tətəlna ndæshigu anə njira gæra a'yi njir Yahudiya mai, ænggær kæra ji nə nyi anə Biturusu thlær tətəlna ndæshigu anə njir Yahudiya.

⁸ Kəja Hyal kæra mæl thlær lagur Biturusu aga mæl thlær anə njir Yahudiya, naja tsu ngə mæl thlær lagu ða aga ya ða cama səsau anə njira a'yi njir Yahudiya mai.

⁹ Ənggæra ndə lar ænggæra Hyal cabiya ða mayi-wakur nyi abangau, ba Yakubu, ænga Biturusu, ba Yahwana hæggæri ænga yau. Nanda kæra njir tædæmwa anə njir nu Yesu, ndə dləwur 'ya ænga Barnabasu ænga hudə zəməu. 'Yi hæggæri wu pama 'ya aga 'ya ma'yi a ndəgya njira a'yi njir Yahudiya mai, ænga nanda tsu nda ma'yi a ndəgya njir Yahudiya.

¹⁰ Kəl kə ndə dəngari 'ya abər 'ya sara fari ənga nji dəfəli kəra wu pama nda mai. Alaga kə tsu kadəu ya vər cim ya məl abangau.

Bulusu Kughiya Biturusu

¹¹ Ar pəci kəra Biturusu shili wu məlmə Antakiya, kə yi kughiya nyi a du bama ja, arya sər məla ja a'yi tsa'a mai.

¹² Tsu kadəu ju səm sər səm ənga njir nu Yesu njira a'yi njir Yahudiya mai. Ama ayukuda shilər njira Yakubu səwa a shili wu Antakiya, kə Biturusu tsana dzau, ji də paməu. Ji məl abangau arya ju hivər njira wu yiwu nja thlana nyi pəlzha anə njira a'yi njir Yahudiya mai.

¹³ Abangə ma aleniyi njir Yahudiya njir nu Yesu məl culi najaka ngguta vi ənggər nə Biturusu kau. Sər məla nda kə tsu ma, ka bəlana hangəkala Barnabasu.

¹⁴ Ama ta yi lari sər məla nda a'yi wu nu jirkur nə ndəshigu mai, kə yi kughiya Biturusu wu mwar nji patəu, “Nagau, ndər Yahudiya ngau, ama kəja gu nggya ənggər njira a'yi njir Yahudiya mai. Nagə a'yi wu nggya ənggər njir Yahudiya mai. Aga mi nga gu ca njira a'yi njir Yahudiya mai, aga nda nu sər ciji nə Yahudiya ka?”

¹⁵ “Alaga kə namən njir Yahudiya ngau lagur ya, a'yi njira gəra njir Yahudiya njir bikə mai,

¹⁶ wu sən mən abər ndə a'yi a sən uya nggya tsapəu wu mwar Hyal lagur nu dladə mai, kəl ma ji mbərsa ənga Yesu Kərsiti. Agabangau, namən ma a lər mən kərmən anə Kərsiti Yesu, aga mənə də nji tsapəu wu mwar Hyal lagur mbərsa ənga Kərsiti

ama a'yi lagur nu dladə mai. Arya ndə a sən uya nggya tsapə wu mwar Hyal lagur nu dladə mai.

¹⁷ Ama ar pəcira mən wu yiwu mənə da nji tsapəu wu mwar Hyal lagur mbərsa wu Kərsiti, ama ba nji thləwa mən ənga kərmən njir bikau. Kə a cabiyari abər Kərsiti wu tsətsəku aga nja məl bikə ya? Awau, alaga kushu!

¹⁸ “Ama ma yi bəra hər sərə yi vakana tsu kadəu a cabiyari abər nayi ndər bəl dladə ngau.

¹⁹ Lagu nu dladəu, a dər yi tətəu anə dladəu, aga ya nggya nə Hyal.

²⁰ A dlakəya dər nji ənga Kərsiti. Kabangəkau, a'yi mbəmbədə nga nyi mai, ama Kərsiti ngu nggya wu yau. Najaka nggya kəra yu nggya wu kumər dzau, nggya nə mbərsa ənga Zər Hyal, ndəra yiwu da ba ji tau arya yau.

²¹ Nayi wu piyari mayiwakur nə Hyal mai. Arya ma ndu sən uya nggya tsapə wu mwar Hyal lagur nu dladəu, ka cabiyari abər tər Kərsiti a dər sə kurthləu.”

3

Nu Dladəu Əndəga Mbərsa

¹ Nahyi njir Galatiya, thləkə wu tə hyi ya? Əndəga vanyi ndə gwadər kəra hyi ya? Kəja ar babal nga yi cabiya hyi Yesu Kərsiti ndəra tə ar wu dladlakau.

² Kabangəkau, yu yiwu ya yiwar hyi vanyi sau. Mambəl Hyal shida ar kəra hyi arya hyi nu dladə ya, əndəga ara hyi hənggəri ənga ndər kəra hyi nggari ya?

³ Kabangəkau, thləkə wu tə hyi ya? Kəja hyi dzəguya wu Mambəl, ama kəja hya bəra jamuya wu ndəndəkur!

⁴ Ya, culi ɔwaɔwatə paməpamə kə hyi səsə'wuri kau, a ɔari sə kurthlə ya? A'yi a kyau, abangə mai.

⁵ Hyu nggani Hyal nə hyi Mambəl nyi, ənga ju məl sə dədəgur'yar wu pama hyi ara hyu nu dladə ya, əndəga ara hyi hənggəri ənga ndər Kərsiti kəra hyi nggar ya?

⁶ Tsamiya mə nggyar Ibrahimu ja. Nji tsəfəri abər, “Arya Ibrahimu mbərsa ənga Hyal, kə Hyal jigəwa nyi ar viya ndə tsapəu.”

⁷ Hya sənbiya abər njira hənggəri ənga Hyal, nanda ngə culi Ibrahimu.

⁸ Ləkakadə nə Hyal a nanari tsu kadəu, abər, Hyal wu nda məliya njira a'yi njir Yahudiya mai a uya nggya nə tsapəkur lagur mbərsa. Arya tsu kadəu, Hyal nar nyi anə Ibrahimu lagu ndəshigu, abər, “Lagu ngau, ngə patər 'yi'yi wu nda uya barka.”

⁹ Hyal fənggər nyi barka anə Ibrahimu arya mbərsa nyi, agabangə kalar ndəra mbərsa ənga Hyal, ju nda fənggər nda barka daɔə ənga Ibrahimu.

¹⁰ Kalar njira wu nggani abər nu dladə nə Musa ngu məliya tsapəu, a ɔar nda nji shishi'wau. Ara ndər Hyal kəra tsətsəfə nana, abər, “Kalar ndəra gəra nubiya patər səra tsətsəfau, wu Ləkakadə nə dladəu, a ɔar ja ndə shishi'wau.”

¹¹ Ar babal nga nyi, ndə a'yi a sən uya nggya tsapə wu mwar Hyal lagur nu dladə mai, arya tsətsəfə nga nyi abər, “Ndə tsapəu, wu uya mbədau lagur mbərsa.”

¹² Sər daɔəri nu dladəu ənga mbərsa a'yi mai. Ənggər kəra nji tsəfəri, “Kalar ndəra nubiya patər səra nji nana wu dladəu, ju mbədau laguwa nyi.”

¹³ Kərsiti a bəliya mən ri sara wu shi'wu nə dladau. Arya tsətsəfə nga nyi abər, “Kalar ndəra nji dlakəya ar wu dladlakau, a dər ja shishi'wau.”

¹⁴ Kərsiti a bəliyar nji aga njira a'yi njir Yahudiya mai a uya barka nə Ibrahimu, aga mənə uya Mambəl kəra Hyal məliya alkawal lagur mbərsa.

Pampaməkura Dladau Ənga Alkawal

¹⁵ Wazha ama, bəgə ya nar hyi karapə ar kəra sərə hyi tsəliya. Ma alkawal kəra nji mbiya, nji fuwa tsi a gwa, ənga nji hənggəri ni, ndər sən pəlna ənga ja cakəri a'yi mai.

¹⁶ Agabəngau, alkawal ngə Hyal məliya ənga Ibrahimu ba culi nyi. A'yi nji tsəfəri abər, “Culi nyi'yar mai,” kəra wu cabiya abər nji gangə ngau. Awau, ama ji na “Culi ngau,” kəra cabiya ndə zəmə ngau, ca ngə Kərsiti.

¹⁷ Sərə yu na ca ngə, dladə kəra shili ayukudə fa gharu fodəu ənga makər kumou nyi nə alkawal, a sən məliya alkawal kəra Hyal mbiya wu pama ja ənga Ibrahimu ja də sə kurthlə mai.

¹⁸ Maja abər nju uya barka kau, lagur nu dladau, naji bəra də lagur alkawal mai. Hyal nə nyi barka anə Ibrahimu lagur alkawal kau.

¹⁹ Ma abəngə ja, aga mi ngə Dladə shila? Nji shili ənga Dladə aga ja cabiya mən bikər mən ar babal, kəl pəcira alkawal kəra wu shili lagu culi Ibrahimu kə nyabiya dzau. Dladau, waladi'yar ngə shili ni, lagur ndər ta'yau wu pama Hyal ənga nji.

²⁰ Ndər ta'yi wu pama nji ənga Hyal, a sən də ja ta'yi ar kəra ndə zəmə mai, ama Hyal zəmə nga ja.

Sərə Dladə Cabiya

²¹ Dəm ya, dladə wu də dawa ənga alkawal Hyal ya? Awau, alaga kushu! Arya maja abər dladə wu sən shili ənga pi, tsapəkur ma nju sən uya lagu dladau.

²² Ama tsətsəfə nga nyi wu Ndər Hyal, abər, duniya patə mafa bikə nga nda. Səkə də abangə aga sərə nji hər alkawala nyi lagur mbərsa wu Yesu Kərsiti, nja ləri anə njira hənggəri.

²³ Divira mbərsa shili, dladau, a mbiya mən ri wu fursəna, lagur biya a'yi mai, kəl lagur mbərsa ənga Yesu cabiya dzau.

²⁴ Nji fuwa mən wu tsa dladau aga ja hər mənə ndəgya Kərsiti. Lagu kau, nga mən wu uya nggya tsapəu, wu mwar Hyal lagur mbərsa.

²⁵ Kabangəkə tsu, pəcir mbərsa a shiləri, tsu mən a'yi əgyakidə dladə mai.

Wazha Hyal

²⁶ Lagur mbərsa wu Kərsiti Yesu ngə patəkura hyi nggya wazha Hyal.

²⁷ Abangə tsu nahyi njira nji məliya hyi baβətizəma, a dər hyi nə Kərsiti, sər məla hyi ja də sər məla Kərsiti.

²⁸ Agabangau, pampaməkur a'yi mai wu pama njira njir Yahudiya ənga njira a'yi njir Yahudiya mai. Ətsu njira mafa ənga kambər nji mai, ənga mala ənga sal. Patəkura hyi nji zəmə nga hyu Kərsiti Yesu.

²⁹ Ma tsu nə Kərsiti nga hyi, a dər hyi culi nə Ibrahimu, ətsu hyu nda dləwuri sər fa'a ki kəra Hyal məliya alkawala nyi.

4

¹ Səra yu na ca ngə, ar pəcira ndər fa'a ki ar viya zər ngau, a'yi ja pamə a mwa ara mafa mai, alaga kə naja ngə ənga ki kə papatəu.

² Əgya kida njira hə nyi ənga njira dənyi fuwa kar nyi wu tsa nda ba'anə shili ar pəcira dənyi fiya.

³ Abangə nga nyi tsu anə mən, ar pəci kəra mən tsu wazha divira Kərsiti cabiya dzau, namən ənggər mafa anə səra a vər səm təlkur ar kəra duniya.

⁴ Ama wu pəci kəra Hyal pabəri nyabiya dzau, kə Hyal səwa Zər nyi. Ji shili lagu mala. Nji ya nyi əgyakida dənama nə dladau,

⁵ aga ja bəliya njira əgyakida dladau, ənga ja shabiya mən ar viya wazha Hyal.

⁶ Arya namən wazha Hyal, ca ngə Hyal səwa Mambəl Zər nyi wu dəfuwa mən, aga ja nə mən dənama nə ngga Hyal, “Abba, Tada!”

⁷ Kabangəkəu, tsu nahyi a'yi mafa mai, ama wazha nga hyi. Ta dəri wazha nga hyi, Hyal wu nda məliya hya da ndər fa'a ki.

Nggyabiya Njir Galatiya Nə Nyi Dənga Sau Anə Bulusu

⁸ Dədəməu, ar pəcira hyi gəra sən Hyal, hyu səm mafakur anə katə'yar, kəra gəra ar viya sau.

⁹ Ama kabangəkə kəra hyu sən Hyal, əndəga Hyal ngu sən hyi. Mi ngə da hyu bəra sha a ndəgya kida təlkur kəra gəra ənga dənama? Sə gəra kər nga nda, mi ngə da hyu yiwu hya bəra sha aga mafar nda?

¹⁰ Kəja hyu lər kərhyi aga bəla alenyi pida'yar ənga hya'yar, ənga pəci paməpamə ba fa'yar.

¹¹ Səra hyu məl kau a nə dəri dənga sau, ara a dəri ənggər patər ɓwaɓwatə kəra yi sa ar kəra hyi kau sə kurthləu ngau!

¹² Yu kədi hyi wazha ama, hya nggya ənggər nayau. Arya nayi ənga kərda ənggər nahyi nga yau. Sə a'yi hyi ndzana da mai.

¹³ A sən hyi shiləgə kəra uya da, naja ngə məliya lagu kəra yi həri hyi ndəshigu nə tanggərma.

¹⁴ Alaga kə shiləgə kau da sər ɓwakər dədəgaləu anə hyi, alaga abangau nahyi didana da mai, ənga hyi nggəl ara dləwu da mai. Hyi dləwuri da ənggər waladi sara ara Hyal, ənggər Kərsiti Yesu ənga kərnyi.

¹⁵ Hyi da ənga caguli gagadau ar pəci ta! Kabangəkə ya, əmani ngə cagulir hyi ta? Pakatə ar pəci ta, wu sən yau, abər hyu sən təkudəbiya liya hyi, ba hya nə da!

¹⁶ Ya, hyi shabiya da dawar hyi arya yi nar hyi jiri ya?

¹⁷ Nji'yar kau, ndu yiwu nda kaghibiya hyi, ama a'yi wu mənəhəkər mai. Ndu yiwu nda təkəbiya hyi ənga yau, aga patər dəngər hyi nda sha a ndəgya nda.

¹⁸ Ma dəngər nji mənəhə nga nyi, a dar mənəhə cimu nda cabiya yiwu wu gau, a'yi kəl pəcira yi ənga hyi waci mai.

¹⁹ Nahyi wazha da, kəra yi ɓəra dar tsəkar ya nda, kəl Kərsiti ciya dzau wu dəfuwa hyi.

²⁰ Cim da ya nggya ənga hyi ba'anə kabangəkau, ba ya bəlana dāha yau, arya a'yi yi ənga dənga sə gagadau ar kəra hyi!

Karapau Ar kəra Hajaratu Ənga Saratu

²¹ Nahyi, hya nar da, nahyi njir yiwu nu dladau, a sənbiyar hyi səra dladau wu na ya?

²² Tsətsəfə nga nyi abər Ibrahimu a'yi ja ənga wazha shili məthləu, pathləu, zər kəra nji ya lagu mala mafa, ənga vanyi tsu lagu kambər mala.

²³ Zər kəra ji yabiya ənga mala mafa kau, nji yabiya nyi lagura nji tsəliya. Ama zər kambər mala kau, nji yabiya nyi lagur alkawal kəra Hyal mbiya.

²⁴ Najakau, karapə ngau, mathləkə'yi kə məthləu kə cabiya alkawal mbamba məthləu. Hajaratu ngə cabiya ndər ya mafa, naja ngə alkawal mbamba nə Mə Sənyau.

²⁵ Kabangəkau, Hajaratu a nggyari ar viya Mə Sənyau kəra wu 'yi'yir Arabiya. Naja ngə ar viya məlmə nə Urshalima kabangəkau, arya naja ənga wazha nyi patə mafa nga nda.

²⁶ Ama Urshalima kəra a dəməlməu, kambər ndə ngau, ətsu naja ngə mər mən.

²⁷ Tsətsəfə nga nyi abər,
“Ga da ənga hudə pərtəu,
nagə mala kəra gəra ya.

Ga wau nə caguli,
nagə ndəra gəra nggari kwakwadə nə ya.

Arya wazha mala hya a dari nda gangəu.
A ndiyar nda mala mayiwa.”

²⁸ Kabangəkau, wazha ama, Hyal a məliya mən ri ənggər Ishaku, wazha nə alkawal.

²⁹ Ar pəci ta tsu zər kəra nji ya wu lagur kəra nji tsəliya, ji nə nyi ɓwaɓwatə anə zər kəra nji ya ənga dənəma nə Mambəl Hyal. Abangə nga nyi ba'anə kabangəkau.

³⁰ Ama tsətsəfə nga nyi wu Ləkakadə nə Hyal abər, “Ga kədləna mafa kau ənga zər nyi, ara zər mafa kau a'yi wu təkə sər fa'a ki ənga nə zər kambər mala mai.”

³¹ Agabangau, wazha ama, a'yi mən wazha mala mafa mai, ama namən wazha kambər mala ngau.

5

Kambəkur Wu Kərsiti

¹ Aga nggya kambəkur ngə sərə də Kərsiti pəliya mən, arya kau kəl hyi ta'yi ənga dənəma, a sərə hya bəra shabiya kərhyi anə bwaḃwatə nə mafakur dladə mai.

² Hya nggar də. Nayi Bulusu yu na anə hyi, ma hyi hənggəri nja thlana hyi pəlza, najakə wu ca abər Kərsiti a'yi ənga akkəri anə hyi mai.

³ Yu bəra dəngari hyi abər kalar ndəra hənggəri ja nu dladə nə thla pəlza, yau, a dāri anə nyi tsa'a ja nu patər sərə dladə nana.

⁴ Nahyi kəra wu nərdzau hya uya tsapəkur wu mwar Hyal lagu nu dladəu, a dāri, a thlənar hyi kərhyi sərə wu nu Kərsiti ja. A sanar hyi dzau ara mayiwakur Hyal.

⁵ Ama lagur Mambəl ənga mbərsa nga mən wu səkə dabə ənga fər kər aga Kərsiti a nə mən tsapəkur nyi.

⁶ Arya ma mən wu Kərsiti Yesu, alaga pəlza, alaga gəra pəlza, a'yi vanyi sə mai. Ama sərə mənə tsamə, ca ngə mbərsa mən kəra wu cabiya dzə lagur yiwudzau.

⁷ Tanggərma hya vər dumwa gagadəu. Wa ngə kar hyi ara nu nə jijira?

⁸ Kadzangə ngguta vi kəra shili anə hyi, a'yi sara ara Hyal kəra ngga hyi kə ngə mai.

⁹ Ənggər kəra nju sən na, “Thləlamə kəra kushu a sən məliya macikəl ja thləthlau.”

¹⁰ Papalkur kərda wu thlər Thlagəu, a hənggər yi abər nahyi bəra nu vanyi dəhə pamə a ndiya nəda mai. Ətsu kalar ndəra wu hya'a hangəkala hyi, ju nda sa bwaḃwatəu, alaga wa nga ja.

¹¹ Wazha ama, ma ba'anə kabangəkau, yu tətəlna ndər Hyal abər aga nja thla pəlzha, ya, mi ngə da ba'anə kabangəkə tsu nju lə bwaḃwatə anə da? Ma yu dləwa nji abər a dər tsa'a nja thla pəlzha, ndər da ar kəra tər Kərsiti ar wu dladlakə a'yi a bəra sən da sər thlə hi anə kalar ndə mai.

¹² Ar kəra njira wu hya hangəkala hyi abər kəl nji thlana hyi pəlzha, kuji anə nda nyi nja thlabiya nyi aga məci'u sal!

¹³ Nahyi, wazha ama, a ngga hyir nji aga kambəkur ar kəra dladau. Hya hangəkala a sara da kambəkur hyi kau, ja da nə sər cim nə kumər dzau. Ar viya kau, bəgə kambəkur hyi, ja da kəra wu həri hyi a ndu yiwu məl thlər nə yiwudzau.

¹⁴ Arya patəkura dladau, a daḃər nju dəhə zəməu, ca ngə, “Ga yiwu təwul ngau ənggər kərngau.”

¹⁵ Ama ma hyu par kərhyi ənga hyu nggal kərhyi ənggər ma'wi tagəu, hya nggya ənga hangəkala ja, ma a'yi mai patəkura hyi, hyu sanakər!

Nggya Lagu Mambəl

¹⁶ Səra yu yiwu ya na kau, ca ngə hya nə nyi lagu anə Mambəl Hyal ja lə hyi. Ma hyi məl abangau nahyi wu nda nggya wu ndəndəkur mai.

¹⁷ Arya nggya nə ndəndəkur dawa nga ja anə Mambəl, Mambəl tsu, dawa nga ja anə nggya nə ndəndəkur. Culi najaka nggya tsu dawa nga nda ənga kərnda. Ca ngə də nahyi wu sən məliya sərə hyu yiwu hya məl mai.

¹⁸ Ma Mambəl Hyal ngu lə hyi, nahyi a'yi hyi əgya dladə mai.

¹⁹ Sər məla ndər bikau, ar babal nga nda. Nanda ngə səsukur, ənga məl sə gərə kyau,

²⁰ ənga məl thlər katəu, ənga dəshakur, ənga piyari shishir dza kuvwar nda, ənga pa wu pamə ənga də shishi ənga tsu dəfu, ənga yiwukər ba təkəbiya dzau, ənga hya hangəkala nji,

²¹ ənga shishikur, ba ənga sa sə sasa, ənga alenyi sə kərə papa 'yar kə tsu. Yu kughi anə hyi, ənggər kərə yi nar hyi tsu kadəu, abər njir məl najaka sau, nandə wu gwu təlkur Hyal mai.

²² Ama wazha kərə Mambəl wu ya, nanda ngə yi-wudzau, ənga caguli, ənga hudə pərtəu, ba səsə'wu sau, ənga hangəkalkur, ba mənəhəkur, ənga tsa'a miya dəfukur,

²³ ba bətsəkər kər, ba tsu sha yi anə sərə kumər dzə wu yiwu. Sə'yar kau, a'yi dawa anə dladə mai.

²⁴ Patəkura njira nə Kərsiti Yesu ngau, a tsəyar nda nggyabiya nə ndəndəkur ənga sə dəmwa'yi'yar paməpamə kərə dza ndu yiwu.

²⁵ Ta də Mambəl ngə nə mən pi, bəgə Mambəl tsu ja ləbiya mən wu kalar nggyar mən.

²⁶ A sara mənə də njir hakər mai, alaga njir tsətsəbwar kərnda, əndəga njir də shishi kərnda.

Hya Dləwar Kərhyi

¹ Wazha ama, ma nji lar vanyi ndə a vər məl bikau, nahyi kəra nyinyau ənga Mambəl Cicau wu pama nda, bəgə hya shabiya nda a shili ənga hangəkal. Ama hya məl abəngau ənga hangəkal tsu, ara a vər sha zamər hyi a shili wu lagu, ba hya təfau a gwu dzau.

² Hya dləwar kuvwar hyi lagur hə ɓwaɓwatər nda. Lagu kə nga hyu nyabiya dladə nə Kərsiti.

³ Ma vanyi ndu nggani abər vanyi sə nga ja, ama a'yi ja vanyi sə mai, ngguta kərnyi nga ju məl.

⁴ Bəgə kalar ndə ja dzəgabiya sər mələ ja. Ma da mənəhəu, ənggau ja sən ɓwasau ənga səra ji məliya ənga kərnyi, ama a'yi ja gəla kərnyi ənga vanyi ndə mai.

⁵ Arya tsa'a nga nyi anə kalar ndə ja hanggər thlər nyi.

⁶ Kalar ndəra nji highiɓər nyi ndər Hyal, kəl ja təkəya sə mənəhə kəra ara ja ənga ndəra highiɓə anə nyi.

⁷ A sara hya ngguta kərhyi mai, ndər sən canə nyi dabar anə Hyal a'yi mai. Kalar səra ndə thləkana, ca nga ju gəm.

⁸ Ma ndə thləkana wu sə suna nə kumər dzau, səra ju nda gəm ca ngə tau. Ma ndə thləkana wu səra Mambəl wu yiwu, səra ju nda gəm ca ngə pi kəra gəra kudau.

⁹ Agabəngə a sara mənə həfə ənga məl mənəhəkər mai, arya ar pəci kakalə mənəu nda fa'a sə nə barka ma mən gəra ta'yi ar lagu.

¹⁰ Arya kau, kalar pəci kəra mən ənga lagu, ta'yi mənə məl mənəhəkər anə nji patəu, ja da ma anə wazha ama kəra wu Kərsiti.

A'yi Thla Pəlzha Mai Ama Nggya Mafəliyangə

¹¹ Kabangəkau, hya tsamiya culi tsəfə dədəgal kəra yi məl anə hyi ənga pəla yau!

¹² Nji kə wu yiwu kəl nja thlana hyi pəlzha kau, ndu yiwu nja lar nda ar viya vanyi sau. Ndu məl anə hyi abangau, arya ndu hivər sa ɓwaɓwatə kəra ndu sa lari arya highiɓə ar kəra wu dladlakə nə Kərsiti.

¹³ Alaga njira nji thlana nda pəlzha ma, nandə wu ɓəlari dladə mai. Nanda ndu yiwu nda thlana hyi pəlzha aga nda hya kər abər nanda ngə səwa nji thlana hyi pəlzha.

¹⁴ Ama alaga kushu nayi wu hya'a kər mai, kəl ənga wu dladlakə nə Thlagər mən Yesu Kərsiti. Arya lagur tə nyi ar wu dladlakau ngə sər duniya tənəkər wu yau, nayi tsu a tənər yi kər ənga sər duniya.

¹⁵ Pəlzha, gəra pəlzha a'yi nda sə mai, sə dəgal ca ngə nda ɗa ndə mafəliyangə.

¹⁶ Jaməkur ənga təhudəkur nda nggya ənga patər njira wu nu sər ɓəla kau, nanda ngə njir Izirayila nə Hyal.

¹⁷ Ayukudə nyi wazha ama, a sara vanyi nda ɓəra fuwa ɗa wu ɗənga vanyi sə mai, arya məcavidi kəra ar dza yi kau, a cabiyari, abər nayi nə Yesu ngau.

¹⁸ Wazha ama, bəgə mayiwakur nə Thlagər mən Yesu Kərsiti a nggya ənga mambələr hyi. Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95